



QUATRIEME SERMON.

PSEAVME XVI.

*N. 10. Car tu n'abandonneras point mon ame
au sepulcre, & ne permettras point que
son Sainct sente corruption.*



OMBIEN que S. Pierre au deuxieme chapitre des Actes nous enseigne qu'en ce Pseaume Iesus Christ parle par la bouche de David, & prophetise de sa resurrection, toutesfois depuis le commencement du Pseaume iusques à ce verset que nous vous auons leu, il n'y a rien qui ne puisse conuenir aussi à David, comme estant figure de Iesus Christ. Mais ce qui reste de ce Pseaume ne peut conuenir à David, & est propre à Iesus Christ nostre Seigneur, comme enseigne S. Pierre au deuxieme chapitre des Actes, & S. Paul au 13. chapitre de mesme livre, où il parle ainsi, *Certes David apres auoir serui en son temps au conseil de Dieu, a esté mis avec ses peres. Mais celui que Dieu a resuscité des morts, n'a point senti corruption, asçauoir Iesus Christ.*

Pour,

Nous auons donc en ce passage vne prophetic bien expresse de la resurreccion du Seigneur Iesus. De laquelle aussi Esaie a prophetizé au 33. chapitre, en ces mots, *Il a esté enleué de la force de l'angoisse, & de la condamnation, & qui est-ce qui racontera sa duree ?* Dauid au Pseaume 68. a prophetisé de l'ascension de Iesus Christ, disant, *Tu es monté en haut, tu as mené captifs les prisonniers, tu as donné dons aux hommes,* comme enseigne S. Paul aux Ephesiens chapitre quatrieme. Or cette ascension presuppouse necessairement la resurreccion. La sortie de Ionas du ventre du poisson au troisieme iour, a esté figure de la resurreccion du Seigneur au troisieme iour. Sur tout sont expresses les paroles de ce Pseaume, où Iesus Christ parle ainsi de soi mesme, *Tu n'abandonneras point mon ame au sepulchre, & ne permettras point que ton Sainct sente corruption.*

Mais deuant que d'entrer en cette matiere, est besoin de vous donner l'intelligence de ces mots, *d'ame & de sepulchre* : & vous dire pourquoi & en quel sens Iesus Christ est appelé le Sainct de Dieu.

Quant à ce mot d'AME, l'Escriture quelque fois par ce mot entend la partie de l'homme qui est immaterielle, & spirituelle, qui conduit & anime le corps. C'est en ce sens que Moyle au deuxieme chapitre de Genese, dit, que *Dieu fit Adam en ame vivante.* C'est en ce mesme sens que se prennent tous les passages de l'Escriture, où il est parlé du salut de nos ames.

Quelque fois par les ames l'Escriture entend les personnes, comme quand au commencement

de l'Exode, il est dit, que *septante ames*, c'est à dire, septante personnes *descendirent avec Iacob en Egypte*. Ainsi au 14. chapitre de Genese, le Roy de Sodome dit à Abraham, *Donne moy les ames, & pren pour toy le bacin*. Où nous traduisons, *Donne moy les personnes*. C'est en ce sens qu'il faut entendre les paroles d'Ezechiel au dixhuitieme chapitre, *L'ame qui pechera sera celle qui mourra*. Car le Prophete n'entend pas que les ames soient mortelles.

Mais quelque fois l'Esriture par l'*Ame* entend la vie presente. Comme quand l'Ange dit à Ioseph, mari de Marie, *Vai'en au pays d'Israel, car ceux qui demandoyent l'ame du petit enfant sont morts*, c'est à dire ceux qui taschoyent de lui oster la vie. Et ainsi se doiuent entendre tant de passages des Pseaumes, où Dauid demande qu'il conserue son ame de la main de ses ennemis.

C'est en ce sens qu'en ce passage Iesus Christ dit, *Tu n'abandonneras point mon ame au sepulchre*: c'est à dire, Tu ne permettras point que ma vie soit esteinte & demeure perpetuellement en la mort.

Quant à ce mot que nous auons traduit **S E P U L C R E**, le mot en la langue sainte, le plus souuent ne signifie pas la fosse, ou le tombeau, mais l'estat & condition des morts, soit qu'ils soyent enterrez, ou noyez, ou deuorez par les bestes. Iacob pleurant son fils Ioseph, disoit, *Je descendrai pleurant au sepulchre avec mon fils*, lequel cependant il croyoit n'estre point au sepulchre, mais auoir esté deschiré par les bestes. Ainsi Anne mere de Samuel disoit, *L'Eternel est celui qui*

Genes. 37.
vers. 35.

qui fait mourir & qui fait viure, qui fait descendre au sepulchre & en fait remonter, 1.Sam.2. Oū manifestement par le sepulchre est entendue toute sorte de mort laquelle Dieu euuoye, & de laquelle il peut deliurer. Et peut estre il eust esté plus commode de traduire ainsi ce passage, Tu ne laisseras point ma vie en la mort.

Faut aussi entendre en quel sens Iesus Christ est appellé Sainct, & le Sainct de Dieu, en ces mots, *Tu ne permettras point que ton Sainct sente corruption.* Nous auons au sixieme chapitre d'Esaië le recit de cette vision admirable, en laquelle Dieu apparut au Prophete, assis sur vn throne, les Seraphins assistans en sa presence, & crians l'vn à l'autre, *Sainct, Sainct, Sainct est l'Eternel des armées, tout ce qui est en toute la terre est sa gloire.* Nous apprenons de S. Iehan au 12. chap. que cet Eternel, appellé trois fois Sainct, estoit Iesus Christ nostre Seigneur. Il dit qu'Esaië a dit ces choses quand il vit la gloire d'icelui, & a parlé de lui. Au 3. chap. de l'Apocalypse Iesus Christ est appellé *le Sainct & le veritable.* Et l'Ange Gabriel annonçant à la Vierge Marie la conception du Seigneur Iesus, lui disoit, *Ce qui naistra de toi sera Sainct, & sera appellé le Fils de Dieu.* Car ce titre de Sainct lui est attribué, mesme entant qu'il est homme. L'union personnelle avec la nature diuine a sanctifié la nature humaine. Et c'est vne des causes pour lesquelles il a esté conceu d'vne vierge, sans moyens humains, afin que la nature humaine fust exempte des souillures du peché originel. Dieu ne lui a pas donné l'esprit par mesure, Jean 3. Toute plenitude de graces lui a esté donnée,

afin que nous puissions de sa plénitude, *Coloss. 2.*

Aussi il est appelé le *Saint de Dieu*, pource que la sainteté de l'offrande qu'il a offerte pour nous, est seule acceptable deuant Dieu: Ce qui estoit figuré par les agneaux qui estoient sacrifiez sous la Loy, lesquels deuoient estre sans tare & sans macule. Car si Iesus Christ eust esté entaché de la moindre tache de peché, il n'eust pas esté propre à satisfaire pour les pechez d'autrui. Ce que le diable cognoissant a esprouvé contre lui la pointe de ses plus subtiles tentations, afin qu'en le chatouillant d'orgueil ou d'impatience, il le rendist incapable d'estre nostre Redempteur. En ces esprouues & parmi les plus fortes angoisses, son esprit est toujours demeuré en ferme assiete. Il s'est en toutes choses conformé à la volonté de son Pere. Tout ainsi que si on roule & tourne vn tonneau de vin où il y a beaucoup de lie, incontinent le vin se trouble, & la lie s'espand par tout. Mais s'il n'y a point de lie, il ne se trouble point, & conserue toujours sa clarté. Ainsi les hommes qui de leur nature sont corrompus, se troublent aux moindres emotions & sollicitations de conuoitise. Mais Iesus Christ estant sans peché, parmi les plus rudes agitations a toujours conserué la clarté & pureté de son esprit

Ce que ie dis de la pureté & sainteté requise au sacrifice qu'il a offert pour nous, se doit aussi entendre de la pureté & sainteté du Sacrificateur: Selon que l'Apostre aux Hebreux l'enseigne au 7. chapitre, *Il nous conuenoit auoir vn souverain Sacrificateur, qui fust saint, innocent, sans*

macule,

macule, qui n'eust point necessité d'offrir sacrifices, premierement pour ses pechez, puis apres pour les pechez du peuple.

Adjoustez à cela que Iesus Christ est appelé le Sainct de Dieu, pource qu'il nous consacre à Dieu, afin que nous lui soyons vn peuple peculiar, & les premices de ses creatures. C'est par lui que Dieu nous sanctifie, & verse en nos cœurs l'esprit de sanctification. *Il nous est fait de par Dieu, sagesse, iustice, sanctification, & redemption, 1. Cor. 1.* Il est le Sainct des Saincts. C'est lui qui dit de soi mesme au dixseptieme chapitre de saint Iehan, que pour l'amour de nous il se sanctifie soi mesme, c'est à dire, se consacre à Dieu & à son obeissance, afin que nous soyons sanctifiez en verité.

Reste maintenant à vous parler de ce qui est le principal, asçavoir de la resurrection de Iesus Christ predite en ce passage. Cette matiere est de telle importance que souuent sous la resurrection de Iesus Christ toute la religion Chrestienne est comprise. Au premier chapitre des Actes des Apostres il est dit, que lors qu'il fut question de choisir vn Apostre en la place de Judas, saint Pierre dit qu'il falloit choisir quelcun qui fust témoin de la resurrection du Seigneur, comme si en ce seul point consistoit la predication des Apostres. Au dixieme chapitre de l'Epistre aux Romains, S. Paul dit, *Si tu confesses le Seigneur Iesus de bouche, & que tu croyes en son cœur que Dieu l'a ressuscité des morts, tu seras sauué.* Comme si la seule creance de la resurrection du Seigneur suffisoit à salut. C'est ce que le mesme Apostre ra-

menteuoit soigneusement à son disciple Timothee, au 2. chapitre de la seconde Epistre, *Aye souuenance que Iesus Christ est resuscité des morts, estant de la semence de Dauid selon mon Euangile.* Et au quinzieme chapitre de la premiere aux Corinthiens, il dit, que *Si Iesus Christ n'est pas resuscité des morts, nostre foy est vaine, & nostre predication vaine.* Car de vray si Iesus Christ n'estoit resuscité, tout ce que Iesus Christ a souffert pour nous, nous seroit inutile. On diroit, il est entré en vn combat, mais il y est succombé. Il a voulu sauuer les autres, mais il ne s'est peu sauuer soi-mesme.

Pour traiter cette matiere distinctement, sçachez qu'il y a trois sortes de raisons pour lesquelles il estoit necessaire que Iesus Christ resuscitast. La premiere est tiree de la iustice de Dieu. La deuxieme est tiree de l'excellence de la personne de Iesus Christ. La troisieme de la nature de la charge, & de nostre redemption.

La iustice de Dieu ne souffroit pas qu'il demeurast perpetuellement en la mort. Car la mort est le salaire du peché. Il eust donc fallu qu'il demeurast en la mort pour quelque peché, alçauoir ou pour ses propres pechez, ou pour les nostres. Il ne pouuoit y demeurer pour ses propres pechez. Car il estoit parfaitement iuste, & sans peché. Aussi il ne pouuoit y demeurer pour nos pechez: car par sa mort il y auoit pleinement satisfait. Pourtant saint Pierre, Actes 2. dit, qu'il estoit impossible qu'il fust retenu par la mort.

L'excellence aussi de la personne requeroit necessairement qu'il resuscitast; car cet homme
citant

estant vne mesme personne que le Fils eternel de Dieu, qui est le Dieu viuant & vray, source & auteur de vie, n'estoit conuenable que le corps du Seigneur, qui est ioint personnellement avec l'auteur de vie, demeurast à tousiours en la mort, & que ce corps que Dieu a fait & choisi pour estre son temple, fust ruiné sans iamais se releuer. Tout ainsi que le poisson engloutissant l'amorce se trouue percé & pris par le hameçon caché sous l'amorce, ainsi la mort ayant englouti Iesus Christ, a esté surmontee par l'aiguillon de la vertu diuine, qui estoit cachée sous l'infirmité de la nature humaine.

L'œuure de nostre redemption requeroit aussi qu'il resuscitast. Car l'Ange Gabriel disoit de lui à la Vierge Marie, *Le Seigneur Dieu* Lui 2. 32. *lui donnera le throno de Dauid son pere.* Falloit donc qu'entant qu'homme & fils de Dauid, il eust l'Empire sur l'Eglise de Dieu. Et S. Paul au quatorzieme chapitre de l'Epistre aux Romains, dit que *pour cela Iesus Christ est resuscité & retourné à vie, afin qu'il ait seigneurie tant sur les morts que sur les viuans.*

Ceci est aussi de son office, qu'estant monté au ciel il intercede pour nous, estant assis à la dextre de Dieu. En cela principalement consiste la gloire des enfans de Dieu, à sçauoir que nous auons vn frere de mesme nature que nous, qui tient le gouuernail du monde, auquel les diables sont suiets, qui a toute puissance au ciel & en la terre, & qui est monté deuant nous, afin de nous preparer lieu, & nous rendre participans de sa gloire. Toutes ces choses ne se-

royent point, & serions priuez de tant de biens, si Iesus Christ n'estoit point resuscité.

L'Apostre aux Romains au quatrieme chapitre dit que Iesus Christ a esté liuré à la mort pour nos offenses, & est resuscité pour nostre iustification: paroles qui ont besoin d'esclaircissement. Car à proprement parler c'est par la mort de Iesus Christ que nous sommes iustificiés: c'est à dire absous, & que nos pechés nous sont remis. Selon que Sainct Paul dit au cinquieme chapitre de la mesme Epistre, où il dit que nous sommes iustificiés en son sang, & que par son obeissance nous sommes rendus iustes. Mais l'Apostre dit que Iesus Christ est resuscité pour nostre iustification; pource que sa resurrection est vne claire preuue de sa parfaite iustice, puis que la mort n'a point eu de puissance sur lui. Or la iustice est la nostre. C'est comme si l'Apostre disoit, Iesus Christ est mort pour nos pechés, & sa resurrection nous donne assurance que nous sommes iustificiés par sa mort.

Cette mesme resurrection du Seigneur Iesus par laquelle il a esté enleué en gloire nous rend certains que l'Eglise de Dieu ne perira iamais. Car comme quand quelcun nage on est assuré qu'il ne se noyera point pendant que la teste est hors l'eau: ainsi nous sommes assurés que l'Eglise, qui est le corps de Christ, quoi que plongee en vn deluge de maux ne perira point, puis que son Chef est eleué par dessus les confusions & agitations du monde en la gloire celeste.

Adjoustez à cela que la resurrection de Iesus Christ

Christ nous est vn gage & vne assurance que nous resusciterons avec lui, comme dit l'Apostre en la deuxieme aux Corinthiens chapitre quatriesme, *Sçachans que celui qui a resuscité Iesus Christ nous resuscitera aussi par Iesus Christ, & nous fera comparoître en sa presence.* Et en la premiere aux Thessaloniens chapitre 4. *Si nous croyons que Iesus Christ est mort & est resuscité, pareillement ceux qui dorment en Iesus Christ Dieu les resuscitera aussi.* Dont aussi le mesme Apostre en la premiere aux Corinthiens chapitre 15. appelle Iesus Christ, les premices des dormans: car comme par les premices toute la recolte de l'an estoit sanctifiée, ainsi par Iesus Christ qui est resuscité le premier, tout le corps de l'Eglise est consacré, & sera viuifié apres lui, comme dit le mesme Apostre au mesme lieu, *Sç les premices sont saintes, aussi est la masse.* Bien est vrai que plusieurs sont resuscités deuant Iesus Christ, comme ceux qu'Elie & Elisee & Iesus Christ mesme a resuscités. Mais ceux là sont morts derechef: & Iesus Christ est le premier qui est resuscité de cette resurrection qui rend les hommes immortels & impassibles: Ceux que Dieu a donnés à son Fils, & qu'il a sanctifiés, resusciteront en vertu & à la conformité de la resurrection du Seigneur Iesus, comme dit S. Paul aux Romains ch. 8. *Si l'Esprit de celui qui a resuscité Iesus Christ des morts habite en vous, celui qui a resuscité Iesus Christ des morts viuifiera aussi vos corps mortels par son Esprit habitant en vous. Les premices, c'est Christ, puis apres ceux qui sont de Christ seront viuifiés à son auenement.* 1. Cor. 15.

Puis donc que de la resurrection du Seigneur Iesus decoulent tant de graces , c'est vrayement vn iour de liesse & de triomphe que le iour de sa resurrection: de laquelle, aussi bien que de sa naissance, nous pouuons & deuons dire ce qui est dit au Pseaume cent dixhuiet, *C'est ici la iournee que le Seigneur a faite, esgayons nous, & nous resiouissons en icelle.* Que si les Anges se sont esiouis à la naissance de Iesus Christ, & ont chanté ce cantique , *Gloire soit à Dieu es lieux treshauts, en terre paix, enuers les hommes bonne uolonté,* combien pensez vous qu'ils se sont esiouis en sa resurrection? veu que sa naissance n'a esté que l'entree au combat, mais la resurrection est la victoire & le triomphe apres le combat acheué? C'est cette heureuse iournee, en laquelle le Soleil de iustice, apres vne eclipse de quarante heures , a repris sa clarté , pour reluire à tousiours, & ne se coucher iamais. C'est cette iournee tant heureuse en laquelle nostre frere ainsné, l'auteur de nostre salut, a brisé les portes de la mort, & est sorti victorieux, chargé de despouilles, reuestu de gloire, despouillé d'infirmité. Nos esperances abbatues se releuent avec lui par vne espee de resurrection.

C'est donc à bon droit qu'une grande lumiere a relui dedans son sepulchre lors qu'il est resuscité, puis que tant de graces en procedent. Et à bon droit l'Eglise du temps des Apostres a voulu qu'au lieu du Sabbath, ou Samedy, le premier iour de la semaine que nous appellons le Dimanche, fust le iour du repos: pource que par la resurrection du Seigneur nos esprits trouuent du

du repos, & vne ferme consolation. Mesmes entre les anciens Chrestiens c'eust esté vn crime de iufner apres Pasques, iusqu'à la Pentecoste: car ils disoyent, *Ce sont là les iours esquels l'Espoux nous a esté rendu.* Et durant ces mesmes iours ils faisoient leurs prieres en l'Eglise, estans debout, en signe d'allegresse.

Faut là dessus, mes freres, que la resurrection du Seigneur parmi tant d'empeschemens soutienne nos esperances, & nous face croire que la verité de l'Euangile, qui en ces derniers temps semble comme enseuelie, se releuera, & ne pourra iamais estre abolie en la terre. Car comme ni la puissance de Satan, ni l'inimitié des Iuifs, ni les gardes apposees, ni la grosseur de la pierre qui bouchoit le sepulchre, ni les liens de la mort n'ont peu empescher la resurrection du Seigneur; aussi tenez pour chose assuree, que ni les efforts du diable, ni la puissance des tenebres, ni l'inimitié des peuples coniuerez, qui comme les renards de Samson consent queuë à queuë les conseils & leurs ruses pour embraser l'heritage du Seigneur, n'empescheront iamais que la predication de l'Euangile ne prenne nouvelle vigueur, & que l'enseigne de la parole de Dieu, qui est abbatue & foulee aux pieds de ses ennemis, ne se releue vn iour avec efficace & autorité, par vne espee de resurrection.

Pour clore ce propos tirons de cette resurrection de nostre Sauueur quelques exhortations à la pieté & crainte de Dieu. Tenez donc pour chose tres-certaine, que nous n'auons aucun vrai bien, ni aucune vertu que par la conformité

avec Iesus Christ nostre Seigneur. Vous ne pouvez estre sauues, si vous n'estes rendus conformes à la mort de Iesus Christ, par la mortification de vos affections charnelles, en crucifiant ce vieil homme, afin que vous soyez aussi conformes à la resurrection par vne nouueauté de vie; c'est ce que dit l'Apostre au 6. chapitre aux Romains, *Afin que comme Christ est resuscité des morts par la gloire du Pere, nous aussi pareillemens cheminions en nouueauté de vie.* De cette resurrection spirituelle est parlé au 20. chapitre de l'Apocalypse, *Bienheureux & saint est celui qui a part à la premiere resurrection, la mort seconde n'a point de puissance sur lui.* Et au 5. chapitre aux Ephesiens, *Resveille toy, toy qui dors, & te releue des morts, & Christ t'esclairera.* Et aux Colossiens chapit. 3. *Si vous estes resuscités avec Christ, cherchez les choses qui sont en haut, là où Christ est assis à la dextre de Dieu.*

vs. 18.

Car l'Escripture parle des hommes non regeneratez, comme de morts en peché, destitués de cette vie que S. Paul aux Ephesiens chapitre 4. appelle *La vie de Dieu*, n'ayans nul sentiment de zele, nul mouuement à bonnes œuures. Mais quand il plaist à Dieu verser en vne telle ame morte en peché quelque estincelle de son Esprit, sa conscience se reueille comme d'un profond dormir. Elle commence à sentir les picqueures des saintes exhortations, & à auoir des mouuemens de pieté & de crainte de Dieu. Dieu lui donne des yeux pour discerner le bien d'auec le mal. Il lui donne ces oreilles dont est parlé au 2. chapitre de l'Apocalypse, *Qui a oreilles pour*
ouyr,

oyez, voyez ce que l'Esprit dit aux Eglises. A cet homme se releuant de la mort se peut appliquer ce que Iesus Christ disoit de Lazare sorti du tombeau, *Desliez-le, & le laissez aller,* afin que desveloppé de peché, il chemine avec liberté & allégresse és voyes de l'Eternel, & s'achemine vers le but de la vocation spirituelle. A ce nouuel homme formé interieurement par l'Esprit de Dieu, aduient chose semblable à ce qui aduint à Iean Baptiste estant au ventre de sa mere, lequel tressaillit à la voix de la Vierge Marie. Car ce nouuel homme tressault à la voix de Iesus Christ parlant à nous en l'Euangile, & sent des vehementes esmotions de crainte, de zele, de ioye, & d'amour de Dieu.

Par cette resurrection spirituelle aduient à un fidele quelque chose de semblable à ce qui est aduenu à Iesus Christ apres sa resurrection. Car ne doutez pas que durant les quarante iours entre sa resurrection & son ascension au ciel, lesquels il a conuersé ici bas pour l'instruction & encouragement de ses disciples, il n'ait eu vn desir ardent & vne inclination vehemente vers les choses d'enhaut. Il lui tarδοit que l'heure vinst en laquelle il prendroit possession de la gloire celeste. Tel est l'estat & l'inclination de l'homme que Dieu a resuscité de cette resurrection spirituelle: La terre lui put, il est degousté des choses d'ici bas: sa conuersation est comme de bourgeois des cieus. Il dit avec Dauid, *Lui! quand me presenteray-ie, quand verray-ie la face de Dieu?* *Ps. 42*

Or combien que ce renouvellement spirituel

soit vn don descendant du Pere des lumieres, lequel donne avec efficace le vouloir & le parfaire selon son bon plaisir, & ne procede pas de nos dispositions naturelles, enclines vers les choses terriennes, ni de nostre bon sens & prudence, ni de nostre franc arbitre, ni du trauail ou eloquence du predicateur; si est ce que Dieu veut que nous trauaillions à auancer cette regeneration, & nous employons à nostre propre salut avec crainte & tremblement, par prieres, par l'exercice des bonnes œuures, par l'ouye & lecture de la parole de Dieu: considerans la briueté de cette vie, la difficulté de la tasche, la grandeur du combat, & l'excellence du prix qui nous est proposé, ayans nostre nature & nos inclinations pour suspectes, afin de suiure en toutes choses le conseil de Dieu. Car en vain parlons nous de la resurrection de Iesus Christ, si cependant nous demeurons en la mort. En vain discouons nous des choses d'enhaut, si cependant nous seruons au ventre, & à l'auarice. Semblables aux aigles, qui apres auoit guindé leur vol fort haut, fondent tout à coup sur quelque charongne.

Sur tout faut considerer qu'il n'est pas de l'œuure de nostre regeneration comme de l'œuure d'vn bastiment, ou de la composition d'vn liure, laquelle quand on reprend apres l'intermission de quelques iours on retrouve son ouurage au mesme estat qu'on l'auoit laissé: Car quant à l'œuure de nostre regeneration, si nous intermettons noster trauail pour vn temps, l'ouurage empiré. Si nous n'auançons nous reculons
par

par necessité. C'est vn ouvrage où Satan & le monde, & nostre chair brouillent tousiours quelque chose. Ayans à nager contre le torrent, si nous relaschons les bras, nous sommes emportez. Si nous intermettons pour vn temps la priere & la meditation de la parole de Dieu, vn cal se forme, & vne froideur se glisse insensiblement és consciences, en sorte qu'en peu de temps nous nous trouuons fort empirez.

Pensons à ces choses, & que chacun s'applique ce que l'Ange disoit à Loth sorti de Sodome, *Haste toy, & te sauue en la montagne.* Sauuez vous de cette generation peruerse. *Empoignez les occasions.* *Rachetez le temps, car les iours sont mauvais.* Ab. 2. 40. Ephes. 5. 16. Que la crainte de Dieu & son amour vous soit vn aiguillon poignant pour vous haster en cette course; considerans le Seigneur Iesus, lequel au bout de la carriere monstre la couronne, laquelle il donnera à ceux qu'il aime, & qui persuereront iusques à la fin. A lui avec le Pere & le Sainct Esprit soit honneur & gloire eternellement. Amen.